

Dua penganggur dipenjara 12 bulan akibat pecah rumah, curi

Mereka mengaku ceroboh, curi komputer riba dan tablet

Oleh Hafizah Abdul Hamid

KUCHING: Padah melakukan jenayah pecah masuk rumah orang dan mencuri sebuah komputer riba serta sebuah komputer tablet, dua penganggur lelaki masing-masing dijatuhi hukuman penjara 12 bulan oleh Mahkamah Majistret di sini semalam.

Majistret Zaiton Anuar memerintahkan hukuman penjara ke atas dua sekawan masing-masing berusia 28 tahun itu, Jekely Silon

dan Jarus Russia, untuk dikuatkuasakan mulai tarikh mereka ditangkap, 16 November lalu.

Jekely dan Jarus mengaku bersalah apabila didakwa mengikut Seksyen 457 Kanun Keseksan dibaca bersama Seksyen 34 yang sabit kesalahan, boleh dijatuhi hukuman penjara sehingga lima tahun dan boleh didenda.

Berdasarkan pertuduhan, lelaki-lelaki tersebut didakwa dengan niat bersama melakukan kesalahan tersebut pada 14 November 2021, sekitar

jam 3 petang di sebuah rumah di Kuching City Mall Batu Kawa, di sini.

Mengikut keterangan kes, seorang wanita berusia 26 tahun membuat laporan polis susulan rumahnya dipecah masuk oleh orang yang tidak dikenali pada hari kejadian.

Antara barangan yang hilang adalah dua dompet masing-masing berisi kad-kad dan dokumen penting, sepasang kasut, sebuah komputer riba dan sebuah komputer tablet.

Anggaran kerugian di-

laporkan sekitar RM5,000.

Hasil siasatan mendapati terdapat kamera litar tertutup (CCTV) di tempat kejadian yang merakam perbuatan kedua-dua tertuduh menceroboh masuk rumah pengadu.

Mereka juga dilaporkan mengambil komputer riba dan komputer tablet milik pengadu.

Pendakwaan dilakukan oleh Pegawai Pendakwa, Inspektor Merylene Lindan Andrew Mang manakala dua sekawan tersebut tidak diwakili peguam.